

## Bagaimana caranya memilih pemimpin dan ketua pemerintahan

Menurut panduan dan ajaran Islam



*Tuan Muhammad Ali al-Hamidi*

“Dalam soal-pemerintahan, mulai dari memilih orang yang patut dijadikan ketua negara, hingga kepada mengatur negara dan pemerintahan, cukup lengkap diterangkan oleh Tuhan dalam al-Quran. Kalau kita turut betul akan segala petunjuk al-Quran, nescaya hidup kita damai dan tenteram” –  
Demikian kata Tuan Muhammad Ali al-Hamidi dalam kupasannya yang berharga ini yang kami sajikan patinya seperti berikut:

Dalam zaman yang terlau cepat terjadi perubahan seperti sekarang ini, banyak benar manusia yang hidup terumbang-ambing, hidup sebagai belon-belon, ke mana angin menghembus ke sana dia terbawa, tidak ada tempat jiwa bergantung, tidak ada tempat mengembalikan amal kerjanya, tidak ada pedoman hidup tempat dia memeriksa dan mengukur benar atau tidaknya segala usaha dan amal yang sedang dan telah dikerjakannya.

*Alhamdulillah*, kita menjadi orang Islam. Ada tempat kita mengembalikan amal-usaha kerana-Nya, ialah Tuhan ar-rabb al-amin, tempat kita menyembah dan menyerahkan diri bulat-bulat kepada Nya, tempat kita memohonkan pimpinan dan petunjuk-Nya, dalam masa menghadapi perkara-perkara dunia yang musykil dan berat ditanggung oleh badan dan jiwa kita.

Adapun nikmat yang amat besar dikumiakan kepada kita, ialah kita suci al-Quran, sebagai pedoman yang tidak

akan berubah-ubah dan bertukar isinya walaupun bagaimana juga berubah dan bertukar keadaan dan kejadian di dunia ini.

Di dalam kitab suci al-Quran itu cukup lengkap diterangkan segala pokok agama, baik yang berkenaan dengan perkara ibadat mahupun yang bertali dengan dunia. Dalam perkara ibadat, luas dan cukup diterangkan cara bagaimana harus kita menghubungkan jiwa kepada Allah Subhanahu wa Ta'ala, supaya tidak ada yang kita takuti dan yang kita sembah selain daripada-Nya. Juga dalam perkara dunia, dari perkara yang sekecil-kecilnya sampai kepada yang sebesar-besarnya, dari perkara orang seorang, sampai kepada perkara yang bertali dengan masyarakat, perkara negara dan pemerintahan.

Dalam perkara pemerintahan, mulai dari memilih orang yang patut dijadikan ketua negara, sampai kepada mengatur negara dan pemerintahan, cukup lengkap

diterangkan Tuhan di dalam al-Quran. Kalau kita turut betul-betul akan segala petunjuk al-Quran, nescaya hidup kita damai dan tenteram.

Adapun undang-undang dasar Islam yang berkenaan dengan pemerintahan, supaya berjalan dengan baik dan damai, Tuhan adakan beberapa hak dan kewajipan atas rakyat dan pemimpin atau ketua pemegang teraju pemerintahan.

Rakyat diberikan hak untuk memilih ketua pemerintahan yang disukai dengan cara bebas dan merdeka, bukan dengan cara pujukkan, tipuan dan ancaman. Kalau sudah terpilih seseorang untuk menjadi ketua pemerintahan maka rakyat diwajibkan berlaku taat dan setia kepadanya, iaitu selama ketua pemerintahan itu berjalan di atas dasar yang benar, tidak derhaka kepada Tuhan, tidak menjual rakyat untuk keuntungan dirinya sendiri.

Pemilihan bagi mengangkat seseorang menjadi ketua pemerintahan, dilakukan dengan cara demokrasi, dan memberi kemerdekaan penuh kepada rakyat untuk bersuara dan memilih dengan bebas.

Maka kita sebagai rakyat harus mengetahui hak kita, sampai di mana hak itu boleh kita pergunakan, dan harus pula kita mengetahui kewajipan kita, hingga perenggan mana kewajipan itu boleh kita terima.

Adapun hak kita, iaitu merdeka bersuara, merdeka memilih, dan berhak pula menuntut kalau hak kita tidak diberikan penuh. Kewajipan kita, ialah berlaku taat dan setia kepada ketua pemerintahan dalam hak dan benar, dan harus menjalankan kewajipan itu dengan tulus ikhlas, serta membantu ketua pemerintahan kita dalam perkara-perkara yang harus dipikul dan ditanggung bersama untuk kebaikan negara dan pemerintahan, dan untuk kemajuan rakyat pada umumnya.

Kalau kita tidak tahu hak kita sebagai rakyat

maka mudah benar hak kita itu diperkosa, dan mudah benar kita dipaksakan untuk menerima ketua pemerintahan yang tidak kita sukai dan tidak kita redhai. Yang demikian itu menunjukkan bahawa hak kita itu telah dilanggar, dan sebagai rakyat yang telah insaf harus berani menuntut hak kita yang telah dilanggar itu.

Kalau hak rakyat diperkosa dalam perkara pemilihan, iaini rakyat dipaksakan bagi menerima seorang ketua pemerintahan yang tidak disukai dan tidak diredhai maka sebaliknya tentulah begitu juga, iaitu ketua pemerintahan tidak suka kepada rakyat. Kalau terjadi hal yang demikian, maka tidak akan dapat membawa ketenteraman dan kesejahteraan. Dan yang demikian ini adalah sejahat-jahat dan seburuk-buruk pemerintahan, sebagaimana dengan tegas diterangkan oleh junjungan kita Nabi Muhammad *salla Allah 'alayhi wa sallam* di dalam hadisnya yang diriwayatkan oleh Imam at Tarmizi:

*Al-lā akhbarkum bikhiyari imra'akum wa shararuhum? Khiyaruhum al-ladhīna tuhibbunahum wa yuhibbunakum wa tad'ūna lahum wa yad'ūna lakum. Wa sharāru imra'akum al-ladhīna tabghaḍūnakum wa yabghaḍunakum wa tal'anūhum wa yal'anūkum.*

Ertinya: “Mahukah aku khabarkan kepada kamu tentang sebaik-baik orang-orang besar kamu dan sejahat-jahatnya? Orang-orang besar sebaik-baiknya itu iaitu yang kamu sukai dan mereka suka kepada kamu. Kamu doakan mereka dan mereka doakan kamu. Dan sejahat-jahat orang-orang besar ialah yang kamu benci dan mereka benci kepada kamu, kamu kutuk mereka dan mereka kutuk kamu.”

Terjadinya keadaan semacam yang tersebut dalam hadis Nabi tadi, ialah kerana rakyat tidak sefaham dan tidak setuju dengan pemimpin. Rakyat mahu kanan, pemimpin mahu kiri umpamanya, tentu sahaja terjadi pertentangan yang tidak membawa kepada kesejahteraan hidup dalam negara.

Begitulah hak kita sebagai rakyat dalam hal pemilihan ketua, pemimpin atau ketua pemerintahan. Dan begitu juga tentang kewajiban kita setelah memilih seseorang menjadi ketua, pemimpin atau ketua pemerintahan. Perkara ini banyak sedikitnya tentu kita mengetahui. Kerana itu, tidaklah saya panjangkan keterangannya.

Tetapi yang terlebih penting harus kita ketahui, ialah tentang siapa, golongan mana, dan bagaimana keadaan orang yang patut kita pilih menjadi ketua, pemimpin atau ketua pemerintahan. Yang demikian ini satu perkara yang boleh disamarkan dan kerap kali umat Islam tertipu dan terpedaya, disebabkan kurang penyelidikan dan tidak jauh pemeriksaan, sebagaimana sering umat Islam disamarkan tentang “*ulul ‘amri*” dan sebagainya.

Dalam perkara ini saya tidak mengeluarkan pandangan yang jauh dan luas. Sebab ayat-ayat al-Quran yang Tuhan jadikan petunjuk bagi perkara ini sangat terang dan nyata. Semuanya boleh faham dan boleh mengerti sendiri maksudnya, asal-sahaja diertikan bunyi ayat al-Quran itu.

Ayat-ayat al-Quran yang menerangkan hal-ini kebanyakan khatib atau kata-katanya dihadapkan kepada orang-orang mukmin, dengan sebutan : *yā ayyuha al-ladhina amanū* – (Hai orang-orang yang beriman). Jadi orang-orang Islam yang tidak menerima ayat-ayat ini, atau tidak suka mendengar ertinya, maka dengan sendirinya ia telah mengeluarkan diri dari golongan orang-orang Islam.

Sekali lagi saya minta supaya memperhatikan benar ayat al-Quran yang menerangkan tentang golongan mana yang

harus kita jadikan ketua, pemimpin atau ketua pemerintahan. Firman Allah *subhanahu wa ta ‘ala* di dalam surah Āli-‘Imrān ayat 118:

*Yā ayyuha al-ladhina amanū lā tattakhizū biṭānati min dūnikum lā ya ‘lūnakum khabālā waddū mā ‘anittum qad badat al-baghdā’a min afwāhihim wama tukhfi ṣudūrihum akbar qad bayyanākum al-āyāti inkuntum ta ‘qilūn.*

Ertinya: “Wahai orang-orang yang beriman! Janganlah kamu angkat (sebagai sahabat karib) orang yang lain kepercayaan dari golongan kamu. Mereka itu tidak putus-putusnya berusaha mencelakakan kamu. Sesungguhnya kebencian telah keluar dari mulut mereka, tetapi apa yang disembunyikan di dalam hati mereka lebih besar lagi. Kami telah terangkan tanda-tanda kepada kamu jika kamu mahu berfikir.”

Dan lagi firman Allah *subhanahu wa ta ‘ala* dalam surah al-Mā’idah ayat 57:

*Yā ayyuha al-ladhina amanū lā tattakhizū al-ladhina ‘takhazū dīnakum huzuwān wala ‘ibān min al-ladhina ūtū al-kitāba min qablikum wal-kuffāra awliyā’ wa ‘ttaqū Allah in kuntum mū’minīn.*

Ertinya: “Hai orang-orang yang beriman! Janganlah kamu jadikan ketua, orang-orang yang menjadikan agama kamu sebagai ejekkan dan permainan, daripada ahli kitab yang sebelum kamu, dan janganlah kamu jadikan orang-orang kafir itu sebagai ketua; dan takutlah kepada Allah jika betul kamu orang-orang yang beriman”.

Muda-mudahan semua keterangan ini memberi manfaat besar bagi kita, dan menjadi pedoman bagi kita untuk mengahdapi pemilihan pemimpin. *Amīn Allahumma Amīn*